



Օ. Ս. ԵԳԱՆՅԱՆ

ԹԱՂԱՎԱՐԴԵՑԻ ԳՐԻԳՈՐ ՔԷ. ԴԱԴՅԱՆՑԻ ՀԱՅԵՐԵՆ ՁԵՌԱԳՐԵՐԻ ՀԱՎԱՔԱԾՈՒՆ

Առաքել Բաբախանյանը (Լեո) «Արձագանք» շաբաթաթերթի 1885 թվականի № 9-ում հրապարակած իր «Մի քանի հեռություններ» հոդվածում խոսելով ժողովրդի ծոցից դուրս եկած այն հասարակ մարդկանց մասին, որոնք սրբությանը են պահպանում անցյալից ժառանգած հոգևոր մշակույթի մասունքները, գրում է. «դոցանից մեկն է եղել և թաղավարդեցի Գրիգոր քահանա Դադյանը, որ վախճանյալ է մի քանի ամիս սրանից առաջ Ծուշիում, թողնելով յուր Սմբատ և Վահան որդիներին հին ձեռագրերի մի հարուստ ժողովածու (մինչև 33 հատ)»:

Իր հոդվածում Լեոն հատկապես կանգ է առել այդ 33 ձեռագրերից առավել արժեքավոր 13-ի վրա և 1—13 թվահամարների ներքո տվել դրանց համառոտ նկարագրությունը, իսկ մյուսների մասին բավարարվել է արձանագրելով. «նաև 20 հատ ուրիշ գրքեր, որոնք հիշատակարան չունին, բոլորը հին, մագաղաթի վերա գրած. դոցա մեջ տեսա մի քանի հատ քերականություն»:

Արդ, ի՞նչ եղան այդ ձեռագրերը:

Քանի որ Լեոն այդ ձեռագրերը բաժանել է երկու որոշակի խմբերի, մի խումբը նկարագրել, իսկ մյուսը՝ ոչ, ուստի անդադառնա՞նք այդ խմբերից յուրաքանչյուրին առանձին-առանձին:

Ա. **Նկարագրված ձեռագրեր.**—Ինչպես ասվեց, Լեոն այդ 33 ձեռագրերից ավելի հանգամանալի նկարագրել է միայն 13-ը: Ստուգումները ցույց են տալիս, որ այդ 13

ձեռագրերից 12-ը (№№ 1, 3—13) մտել են Խաչիկ վրդ. Դադյանի հայտնի հավաքածուի մեջ և արձանագրված են Հակոբ Թովմյանի կազմած ցուցակում, իսկ մեկը (№ 2 «Մաշտոց, գրած հայոց ՌՄԺԵ (1666) թուին Օղմաբերդ գիղի մեջ», որի ուր գտնվելը, ի միջի այլոց, մեզ հայտնի չէ, այդ ցուցակում չի արտացոլված: Այդ 12 ձեռագրերը 1903 թվականին Խաչիկ վրդ. Դադյանի հարուստ հավաքածուի կազմում մուտք են գործել Էջմիածին, իսկ այժմ գտնվում են Մաշտոցի անվան Մատենադարանում (տե՛ս հին և նոր թվահամարների կից տախտակը):

Բ. **Չնկարագրված ձեռագրեր.**—Ըստ Լեոյի, քացի նկարագրված վերոհիշյալ 13 ձեռագրերից, եղել են նաև 20 այլ ձեռագրեր: Անտարակուսելի է, որ ինչպես նախորդները, այնպես և վերջիններս պետք է ժառանգած լինի Խաչիկ վրդ. Դադյանը՝ Գր. քհ. Դադյանցի Վահան որդին, մանավանդ, որ դրա մասին կա Լեոյի պարզորոշ վկայությունը: Հետևապես, չնկարագրված վերոհիշյալ 20 ձեռագրերը պետք է փնտրել ոչ այլ ուր, քան Թովմյանի նկարագրած ձեռագրերի շարքում:

Փորձենք փնտրել:

ա) Ըստ Լեոյի, չնկարագրված 20 ձեռագրերի մեջ կային «մի քանի հատ քերականություն»: Ուշադրություն դարձնենք, որ քերականական ձեռագրերի քանակը եղել է ոչ թե մեկ կամ երկու, այլ՝ «մի քանի հատ», այսինքն առնվազն երեք, կամ նույնիսկ ավելի: Թովմյանի ցուցակում այդպիսիների

թիվը հասնում է 4-ի (№№ 91, 92, 92ա, 93): Պետք է կարծել, որ այդ 4 ձեռագրերը Լեոյի հիշատակված ձեռագրերն են:

բ) Ըստ Լեոյի, չնկարագրված ձեռագրերը գրված են՝ «մագաղաթի վերա»: Եթե Լեոյի ասածը բառացի չհասկանանք, այլ՝ որ այդ ձեռագրերի մեջ մեծ թիվ են կազմել մագաղաթյա ձեռագրերը, ապա կարող ենք ասել, որ խաչիկ Դադյանի հավաքածուի մեջ եղած 12 մագաղաթյա ձեռագրերից առնչված 10-ը (№№ 3, 4, 6, 8, 11, 15, 18, 19, 25, 53) Լեոյի հիշատակված «մագաղաթի վերա գրած» ձեռագրերն են: Մագաղաթյա մյուս երկու (№№ 12, 37) ձեռագրերը բացառվում են, որովհետև առաջինը (№ 12) մտնում է նկարագրված 13 ձեռագրերի թվաքանակի մեջ (№ 7), իսկ երկրորդը (№ 37) Ծաղաթի ձեռագրերից է, որտեղից խաչիկ Դադյանն է վերցրել անձամբ: Որպես հավելյալ փաստարկ նշենք, որ մագաղաթյա այդ 10 ձեռագրերից երկուսը (№№ 6, 8) Տեր Գրիգորի այրին՝ տիրուհի Հյուրիգադ Դադյանցը 1897 թվականին, որպես աջահամբույր, նվիրել է Խրիմյան Հայրիկին: Հավատացյալ տիրուհին ում ձեռագրերը պիտի նվիրեր, եթե ոչ իր հանգուցյալ ամուսնու:

գ) խաչիկ Դադյանի հավաքածուի ձեռագրերից երկուսի վրա (№№ 26, 78) եղած հիշատակագրություններն ու կնքադրոշմները հուշում են, որ այդ ձեռագրերը սկսած 1793 թվականից մինչև 1885 թվականը, այսինքն մինչև Գր. քհ. Դադյանցի մահը, եղել են Ծուշիում: Բացառված չէ, որ ծրնունդների վերաբերյալ եղած գրառումներն էլ կատարված լինեն Տեր Գրիգորի ձեռքով: Հետևապես կարելի է ենթադրել, որ այդ երկու ձեռագրերը նույնպես Լեոյի հիշատակված 20 ձեռագրերից լինեն:

դ) 1897 թվականին խաչիկ վրդ. Դադյանը 4 ձեռագիր է նվիրաբերել, մեկը (№ 7) անձամբ Խրիմյան Հայրիկին, իսկ 3-ը՝ (№№ 60, 80, 81)՝ Մայր Աթոռի Մատենադարանին: Թեև առանձին փաստարկներ չկան, բայց կարծում ենք, որ դրանք ևս Լեոյի հիշատակված ձեռագրերից պետք է լինեն: Այստեղ ուշադրության է արժանի այն

պարագան, որ ինչպես տիրուհի Հյուրիգադի, այնպես և խաչիկ Դադյանի նվիրատվությունները կատարված են միաժամանակ:

Ամփոփենք:

Ելնելով շարադրվածից, որոշ վերապահությամբ, կարող ենք ասել, որ Լեոյի հիշատակված բայց չնկարագրված 20 ձեռագրերը (որոնք հետ այսու կնշվեն աստղանիշ ունեցող 14—33 թվահամարներով՝ որպես նախորդ 1—13 թվահամարների շարունակություն) ամբողջությամբ մտել են խաչիկ Դադյանի հավաքածուի մեջ և Հակոբ Թոփճյանի ցուցակում արձանագրված են 3, 4, 6, 7, 8, 11, 15, 18, 19, 25, 26, 53, 60, 78, 80, 81, 91, 92, 92ա, 93 թվահամարների տակ:

Նշված ձեռագրերից. 6-ը (№№ 6, 7, 8, 60, 80, 81) Մատենադարան են մուտք գործել 1897 թվականին և մտել «Գևորգյան» կոչվող հավաքածուի մեջ, իսկ մնացած 14-ը (№№ 3, 4, 11, 15, 18, 19, 25, 26, 53, 78, 91, 92, 92ա, 93)՝ 1903 և այժմ պահվում են հետևյալ թվահամարների ներքո (տե՛ս հին ու նոր թվահամարների կից տախտակը):

Համեմատական տախտակ

Թաղավարդեցի Գրիգոր քհ. Դադյանցի ձեռագրերի հին և նոր թվահամարների

Հին	Թոփճյան	Գևորգյան	Մատենադարան	Հին	Թոփճյան	Գևորգյան	Մատենադարան
1	27	—	3668	18	—	967	3259
2	—	—	—	19	11	—	3662
3	32	—	3872	20	15	—	3663
4	31	—	3671	21	18	—	3664
5	23	—	3871	22	19	—	4304
6	54	—	3876	23	25	—	3666
7	12	—	3943	24	26	—	3667
8	70	—	3678	25	53	—	3952
9	77	—	3681	26	60	1029	3159
10	52	—	4119	27	78	—	3965
11	62	—	4120	28	80	615	2559
12	63ա	—	3957	29	81	633	2561
13	47	—	3874	30	91	—	3883
14	3	—	4321	31	92	—	3451
15	4	—	3660	32	92ա	—	3967
16	6	362	3784	33	93	—	3685
17	7	897	2582				

* Հակոբ Թոփճյան, Ցուցակ ձեռագրաց Դադեան խաչիկ վարդապետի, մասն Ա, Վաղարշապատ, 1898:

